

NOVEMBER 2012

24 Uur Beheerkamer	028 313 8000/8111
Brandweer	028 312 2400

# Bulletin

*Amptelike nuusbrieff van die Munisipaliteit Overstrand*

## NASIONALE POGING OM BEDROG EN KORRUPSIIE UIT TE ROEI ETIEKWERKSWINKEL IN OVERSTRAND GELOODS

Baanbrekerswerk is in Overstrand gedoen toe 'n werkswinkel oor die etiese aspekte van die munisipale verkrygingsproses op Donderdag 27 September in Hermanus aangebied is. Sowat 150 lede van die sakegemeenskap het dit bygewoon.

Die oogmerk met die werkswinkel, wat deur mnr Kris Dobie van Etiek Suid-Afrika gefasiliteer is, was om integriteit en deursigtigheid in alle interaksie tussen die munisipaliteit se Voorsieningskanaalbestuursdepartement en die sakegemeenskap te bevorder sodat korrupsie en bedrog kollektief getakel kan word.

Etiek Suid-Afrika het dié werkswinkel as 'n loodsprojek beskou sy veldtog om korrupsie by munisipaliteite te bekamp.

Die sakekamers van Hermanus en Gansbaai het 'n sleutelrol gespeel om die geleentheid onder hul lede bekend te stel.

In sy openingsrede het die Munisipale Bestuurder, mnr Coenie Groenewald, die hoop uitgespreek dat die samewerking tussen die sakegemeenskap en die Voorsieningskanaalbestuursdepartement verder uitgebou kan word as deel van die nasionale poging om bedrog en korrupsie uit te wis.

Volgens hom het die munisipale amptenare wat hulle beywer vir die nastrewing van die Overstrand visie om

'n sentrum van uitnemendheid vir die gemeenskap te wees, die sakegemeenskap se begrip nodig vir die wyse waarop hulle besigheid doen en wat van hulle kragtens wetgewing verwag word.

As 'n mens na die huidige etiese en ekonomiese situasie in die plaaslike regeringsfeer van Suid-Afrika kyk, dan is dit duidelik dat ons nodig het om bymekaar te staan om ons plaaslike ekonomie te beskerm en op 'n etiese en deursigtige manier.

Die munisipaliteit het 'n ongekwalifiseerde auditverslag in die vorige finansiële jaar (2010) ontvang en dit beteken dat ons prosedures in lyn is met ons beleide met genoegsame kontroles soos vereis word deur wetgewing. Desondanks moet ons voortdurend probeer om ons stelsels, prosedures en beleid te verbeter sodat ons ons gemeenskap na die beste van ons vermoë kan dien, het Groenewald gesê.

Ter afsluiting het hy gevra dat die werkswinkel nie as 'n eenmalige geleentheid gesien moet word nie, maar as die daargestelling van 'n deursigtige kommunikasieplatform tussen die plaaslike owerheid en die sakegemeenskap. Met so 'n platform in plek kan 'n wen-wen situasie geskep word wat beter begrip van mekaar se behoeftes en uitdagings sal bevorder.



By die Etiek-werkswinkel op 27 September was van links Henk Kleinloog, Direkteur van Finansies, Morné Potgieter, Kontraktebestuurder, Ingrid Thesen, Verkrygingsbeampte, Kris Dobie, Etiek Suid-Afrika, Alta Pretorius, HUB van Hermanus-sakekamer, Gert Wepener, Aankopebestuurder, Coenie Groenewald, Munisipale Bestuurder, Fanie Bothma, voorsitter van Gansbaai-sakekamer, en Mervin Milner, voorsitter van Hermanus-sakekamer.



Parkeeropsigters gereed om in gure weer te werk.

## PARKERINGBESTUUR KRY 'N NUWE BAADJIE

Die bestuur van die parkingbestuurstelsel in die sakekern van Hermanus is op 3 September deur die Munisipaliteit Overstrand oorgeneem en volgens terugvoering ondervind gebruikers reeds 'n groot verbetering in diens.

Heelwat aandag word gegee aan uitgebreide en volgehoue opleiding van die parkeeropsigters om hofflike en doeltreffende dienslewering te verseker. Hul uniforms is ook verander om hulle veral meer sigbaar vir aankomende verkeer te maak.

Die nuwe Parkeer-Betaal-Vertoonstelsel vereis dat gebruikers vooruit vir hul parking moet betaal en dit stel die opsigters in staat om meer aandag te bestee aan ander motoriste wat op soek is na parkeerplek. Vooruitbetaling is egter nie 'n nuwe begrip nie, want gebruikers in Hermanus word reeds vanaf 2010 aangemoedig om dit te doen. Dié boodskap is met die oprigting van nuwe beskrywende tekens versterk.

Indien 'n gebruiker meer tyd nodig

het, kan hy wel later meer tyd koop sonder om sy motor te verskuif. Diegene wat vir lang tydperke wil parkeer, kan gerus van die gratis parkeergebiede aan die buitewyke van die sakekern gebruik maak. In die buiteseisoentye sal daar selfs nader aan die middedorp gratis parking beskikbaar wees in Marinerylaan en Gearingspunt. Op Sondae en godsdienstige vakansiedae is al die parkeering gratis.

Tariewe en ure vir betaalde parke-

ring het dieselfde gebly, buiten Vrydae, wanneer motoriste na 15:00 nie vir parking hoef te betaal nie.

Die Munisipaliteit se hoofoogmerk met die stelsel is om 'n effektiewe stelsel te bedryf wat terselfdertyd handel en toerisme in die gebied sal bevorder. Almal se samewerking met die projek sal ongetwyfeld sukses verseker, sê mnr Paul Pfister, projekbestuurder, Navrae kan gerig word aan 028 313 8919 gedurende kantooreure.

## KRITERIA VIR VERVREEMDING VAN BEKOSTIGBARE BEHUISING VERSLAP

Die Raad van die Munisipaliteit Overstrand het einde September goedkeuring gegee vir die verslapping van die kriteria vir die vervreemding van sekere erwe in Mount Pleasant wat vir bekostigbare behuising, ook bekend as GAP-huisvesting, geoormerk was.

Dié segment van behuisingsmark word gekenmerk deur die feit dat dit bestaan uit huishoudings waar minstens een lid permanente indiensneming geniet of daarin geslaag het om 'n lewensvatbare semi-formele of formele besigheid op die been te bring. Die huishouding is finansiële opwaarts mobiel, maar het nog nie voldoende spaargeld of bates om 'n deposito op

'n behuisingsproduk neer te sit wat die paaiemente op die lening substantieel sal verminder nie.

Onder die kriteria wat voorheen gegeld het, was dat aansekers in die Overstrand-gebied moet woon en 'n inkomste van tussen R3 500 en R15 000 moet verdien. Na drie rondes waarin aanseke aanvaar en ge-evalueer is, kon nog net vier van die 22 eenhede wat beskikbaar was, oorgedra word en was dit duidelik dat die kriteria te streng is en dat die teikenmark vir die projek nie in staat is om die verkoopprys te betaal en vir huislenings te kwalifiseer nie.

In die lig daarvan is die kriteria nou

verslap om ook aansekers in te sluit wat vir minstens drie jaar elders in die Wes-Kaap woon (maar voorkeur sal gegee word aan aansekers wat in Overstrand woon). Voormalige huiseienaars sal ook oorweeg word as hulle kan bewys dat hulle ten tyde van die aanseke nie enige residensiële eiendom besit nie. Die totale maandelikse inkomste van die aanseker se huishouding kan tot R30 000 beloop.

Daar is sewentien eiendomme in die skema nog beskikbaar en die verkoopprys wissel van R97,926 tot R99,750.

By dieselfde vergadering het die Raad goedkeuring verleen dat 'n ver-

dere agt erwe in Mount Pleasant en Zwelihle vir bekostigbare behuising beskikbaar gestel mag word. Die erwe wat beskikbaar gestel word, is 7374, 7375 en 7377 in Angeliestraat, Mount Pleasant, 7386 en 7388 in Leeubekiestraat, Mount Pleasant, en 1635, 1636 en 1637 in Salukazanastraat in Zwelihle.

'n Negende erf in Zwelihle wat vir vervreemding geïdentifiseer was, is na 'n inspeksie deur raadslede van die lys onttrek en gaan na hersonering omhein en as 'n speelplek ontwikkel word. 'n Verdere besluit is dat geskikte grond in die omgewing van die Mount Pleasant-sakesentrum vir doeleindes van 'n crèche gereserveer moet word.

### SO SLUIT KANTORE IN FEESTYD

Met Kers- en Nuwejaarsdag wat vanjaar in die middel van die week val, gaan die kantoorluitings vanjaar anders uitsien as gewoonlik. Munisipale kantore sal op Maandag 24 Desember 2012 en Maandag 31 Desember 2012 gesluit wees vir alle sake, buiten essensiële dienste, maar op die Vrydag voor elk van die lang langnaweke sal daar voldag gewerk word. Na die Kersdae open die kantore soos normaalweg op Donderdag 27 Desember en Vrydag 28 Desember. In die Wes-Kaap is die 2de Januarie ook 'n openbare vakansiedag en sal daar eers weer op Donderdag 3 Januarie besigheid gedoen kan word.

### SAMEWERKING DRA ONS DEUR WATERKRISIS



Die waterbesparingsmaatreëls wat in die gebied van Groter Hermanus sedert Desember 2010 van toepassing was, is einde Augustus met onmiddellike effek opgehef. Die De Bos-dam is tans 92 persent vol, die Gateway-boorgatveld is in volle produksie en die boorgatvelde in die Hemel-en-Aarde-vallei sal binnekort by die gebied se watervoorsieningstelsel aangesluit wees. Burgemeester Nicolette Botha-Guthrie het namens die munisipaliteit dank betuig aan die inwoners vir hul geduld en samewerking oor die afgelope twee jaar om die krisis die hoof te bied. Die erns waarmee die veldtog bejeën is, is onder meer deur 'n opname deur leerders van die Hoërskool Hermanus bevestig. Lara van Rooyen, Kaila Engelbrecht, Lina Bronkhorst en Mianti Oberholzer, wat in dié volgorde weerskante van haar staan, het na besoeke aan 80 huishoudings in Vermont, Onrus en Sandbaai bevind dat almal deurgaans bewus was van die waterkrisis en hul verbruik verminder het. Meeste was op die hoogte van die dam se stand en die prys per kiloliter wat hulle vir water betaal. Inwoners het aangedui dat hulle ten gunste van die hergebruik van gesuiverde afvalwater en ontsouting is. Indrukwekkende pogings is aangewend om by die huis water te hergebruik en reënwater te oes, Waterslim-metodes is gebruik om tuine mooi te hou.

### BOOMPLANTWEEK

Die Overstrandse munisipaliteit het daadwerklik aan Boomplantweek, van 1 tot 7 September, deelgeneem deurdat altesame sestig bome in verskeie gemeenskappe regdeur die munisipale gebied geplant is. Die doel van die poging was om 'n volhoubare toekoms te bevorder, die vergroening van Overstrand 'n hupstoot te gee en die belangrikheid daarvan om bome te plant as teenvoeter vir aardverwarming te beklemtoon. Op Stanford het rdl Dudley Coetzee op Donderdag 6 September 'n geelhoutboom met die hulp van die Busy Bees-kleuterskool geplant. Ook by die geleentheid was lede van Khoisan Implementeringsagentskap en Stanford-Bewaringstrust.



### BOUMATERIAALKENKINGS BENODIG



'n Brand laatnag Vrydag 21 September 2012 het sewentien strukture in die informele nedersetting Overhills vernietig en 36 mense, onder wie 6 kinders, dakloos gelaat. Nadat die brand omstreeks 03:00 geblus is, is bystand onmiddellik verleen om die slagoffers van huisvesting, kos en kler te voorsien. Binne enkele dae kon die Munisipaliteit die slagoffers van spykers, sinkplate en pale voorsien sodat hulle hul huise kon herbou. Die noodlenigingspakket maak egter nie voorsiening vir deure en vensters nie en 'n beroep is op die gemeenskap gedoen om daarmee te help. Mense wat 'n bydrae wil maak, kan die behuisingsbeampte op Kleinmond, mnr Joseph Smith by 028 271 8424 gedurende kantoorure kontak. 'n Onlangse opname het aangetoon dat daar 'n effense afname in informele huishoudings in die munisipale gebied van Overstrand oor 'n ses maande periode voorgekom het - van 3449 in Desember 2011 tot 3436 in Junie 2012. Halfjaarlikse opnames word gedoen om die groei van informele nedersettings te monitor en word ook vir beplanningsdoeleindes deur die munisipaliteit en die provinsiale owerheid gebruik.

## TYGERBERG-KINDERKOOR SING IN HERMANUS



INON BARNATAN



OVERSTRAND ARTS/KUNSTE (OAK) bied aan die einde van hierdie maand twee konserte aan. Op Sondagmiddag, 25 November, sal die Israëli pianis, **INON BARNATAN**, 'n uitvoering gee om 15:30 in die Munisipale Auditorium. Op Saterdagmiddag, 1 Desember, bied die **TYGERBERG KINDERKOOR** 'n Kersuitvoering aan om 19:00 in die NG Kerk op Hermanus. **Kaartjies vir beide konserte is R100 (R50 vir studente).** Skakel BELLINI op 028 312 4988 vir besprekings. Verdere navrae aan René du Plooy op 082 940 4238.